

**O referendumu u RS-u i državnim pravosudnim institucijama**

# Budućnost Suda i Tužilaštva BiH je neupitna

● Sud i Tužilaštvo su, od njihovog osnivanja, na udaru neargumentovane kritike, a u posljednje vrijeme i žestokih napada ● Odluka o referendumu politički avanturizam

“Budućnost Suda i Tužilaštva Bosne i Hercegovine: procesuiranje ratnih zločina i organiziranog kriminala“ bila je tema javne diskusije održane jučer u prostorijama ACIPS-a u Sarajevu.

Kako je u uvodnom izlaganju naglasila predsjednica Suda Bosne i Hercegovine Meddžida Kreso, budućnost Suda i Tužilaštva BiH je neupitna.

Kreso je kazala i to da su ove dvije institucije, od njihovog samog osnivanja, na udaru neargumentovane kritike, a u posljednje vrijeme i žestokih napada.

**Neobjektivno, netačno, zlonamjerno...**

- Kada neko kritikuje ove institucije, to mora biti objektivno, argumentovano i odgovorno. Optužbe koje čujemo, međutim, neobjektivne su, netačne i zlonamjerne. Sud Bosne i Hercegovine nije neustavna institucija, kako to neki žele prikazati, rekla je Kreso, ocijenivši najavu o referendumu u RS-u o opravdanosti postojanja Suda i Tužilaštva BiH opasnom.

Predsjednica Suda smatra da bi posljedice tog referenduma bile pogubne i po druge državne institucije.

- Jer danas sud, sutra neka druga institucija čijim radom pojedini političari nisu zadovoljni, istakla je Kreso.

Potpredsjednik Ustavnog suda Federacije BiH i ad hoc sudija Evropskog suda za ljudska



Od samog osnivanja, na udaru neargumentovane kritike

Foto: A. KAJMOVIĆ

prava Faris Vehabović govorio je jučer o ustavnopravnom aspektu postojanja Suda i Tužilaštva Bosne i Hercegovine.

On je naglasio da je Ustavni sud BiH u više navrata odlučivao o ustavnosti zakona o Sudu i Tužilaštvu BiH i utvrdio da su oni doneseni u potpunosti u skladu sa Ustavom.

- Ono što se često zanemaruje je činjenica da nisu nadležnosti BiH određene samo u članu 3. Ustava BiH, već u cjelokupnom tekstu aneksa 4. Dejtonskog mirovnog sporazuma, rekao je Vehabović.

Kada je riječ o najavi referenduma u RS-u, on to smatra nekom vrstom političkog avanturizma, s obzirom na to da se jasno podrivaju temelji Dejton-

**DOBROVOLJAČKA Barašin je najavio da će u ovoj godini biti okončani veći predmeti ratnih zločina poput Dobrovoljačke ulice i tuzlanske kolone, te organizovanog kriminala**

skog mirovnog sporazuma.

- A znamo da je to dokument koji je zvanično priznao postojanje Republike Srpske. Dakle, sasvim sigurno potez u pogrešnom pravcu. Legitimno je pravo svakog građanina i političkih struktura subjekta da ne budu zadovoljni radom određenih in-

stitucija. Ali, isto tako je zakonom propisano na koji način se može mijenjati zakon o načinu rada tih institucija, kazao je Vehabović.

Glavni tužilac Tužilaštva BiH Milorad Barašin jučer je poručio da se za budućnost te institucije ne treba brinuti.

- To je institucija koja radi svoj posao. Tužiocima su uvijek u svom radu imali protivnika. Mi imamo dobre rezultate, ali uvijek tražim da oni budu na većem nivou. Poseban Odjel za ratne zločine, garantujem, ove će godine dati još veće rezultate od dosadašnjih. S tim predmetima ne treba kalkulirati i oni ne trebaju služiti svrsi jednodnevnih politika, istakao je Barašin, naglasivši da referendum neće i

ne može uticati na rad Tužilaštva BiH, u kojem rade profesionalci.

On je najavio da će u ovoj godini biti okončani veći predmeti ratnih zločina poput Dobrovoljačke ulice i tuzlanske kolone, te organizovanog kriminala.

Kurt Bassuener, analitičar iz Vijeća za demokratizaciju politika, govorio je jučer o temi “Šire implikacije referenduma u Republici Srpskoj na međunarodnu zajednicu u Bosni i Hercegovini”.

**Vrijeme je za SAD**

- Ja bih rekao da je ovaj potez antidejtonski. To se desilo upravo zbog situacije u kojoj se međunarodna zajednica posljednjih godina postepeno povlačila, ostavljajući prostor da se može djelovati na ovaj način, rekao je Bassuener.

On smatra da bi međunarodna zajednica, pod vodstvom Sjedinjenih Američkih Država, trebala zauzeti jasan stav i navesti da će njezine institucije biti ovdje sve dok situacija u BiH ne bude onakva kakva bi trebala biti.

- S obzirom na to da vidimo da narodi ove zemlje nisu uspjeli osigurati očuvanje integriteta ove zemlje, vjerujemo da je neophodno da se povuče taj korak. Moj stav je da je neophodno da Amerika bude lider i ujedini stav Zapada o ovim stvarima, smatra Bassuener.

J. FETAHOVIĆ

## Savjet za razvoj SDP-a BiH

### Promijeniti imidž Parlamenta BiH

Član Glavnog obora SDP-a BiH Mirko Pejanović kazao je jučer da nijedna država ne može imati uspješnu demokratiju ako nema snažan i aktivan parlament u kojem se odlučuje o zajedničkim pitanjima razvoja društva i države. On je bio jedan od uvodničara na sjednici Savjeta za razvoj SDP-a BiH na kojoj je razgovarano o demokratskoj konsolidaciji i problemima funkcioniranja Parlamenta BiH u postdejtonskom periodu.

Kazao je da su sve zemlje postsocijalističke tranzicije prošle ili dijelom prolaze kroz političku tranziciju. U toj tranziciji je osnažen parlament kao centar odlučivanja, donošenja, prije svega, zakona i politika koje su omogućile i ukupnu tranziciju, ali i integraciju tih zemalja u EU. U BiH je, po njegovim riječima, nešto drugo. To je također zemlja postsocijalističke tranzicije, ali i zemlja postratne obnove i zemlja u kojoj se tek uspostavlja parla-



mentarna demokratija.

“Ona je još krhka. To najviše pokazuje činjenica da u svim mandatima nije postojala parlamentarna većina sastavljena na koalicionom političkom programu, nego parlamentarna većina izvedena na partnerstvu“, kazao je Pejanović.

Potpredsjednik SDP-a BiH i poslanik u državnom Parlamentu Denis Bećirović smatra da je potrebno, za početak, promijeniti imidž Parlamenta BiH u cjelini. Njega, kazao je, treba zaista predstaviti kao najviši organ zakonodavne i ustavotvorne vlasti u BiH koji će biti prepoznatljiv po socijalnoj odgovornosti, po redu, disciplini i po mnogo većem aktivitetu nego što je to do sada bio slučaj.

## Budimir - Köck



### Austrija najveći investitor u BiH

Predsjednik FBiH Živko Budimir primio je jučer veleposlanika Austrije u BiH Donatusa Köcka. Razgovarali su o aktualnoj političkoj situaciji u BiH te je s obje strane izražena zabrinutost zbog sporog formiranja vlasti na državnoj razini. Naglašena je bojazan da bi ovakva situacija dodatno mogla otežati put BiH ka EU.

Kock je istaknuo kako je Austrija najveći investitor u BiH, dok je Budimir izrazio nadu kako će se politička potpora Austrije za ulazak BiH u EU, kao i brojna gospodarska ulaganja, nastaviti i ubuduće.

## Zlatko Lagumdžija



### Susret s Ocačkom i Grasselijem

Zlatko Lagumdžija, predsjednik SDP-a BiH, u odvojenim se susretima sastao sa ambasadorom Turske, Vefahanom Ocačkom, i ambasadorom Slovenije, Andrejom Grasselijem. Sagovornici su najviše pažnje posvetili aktuelnim političkim pitanjima u BiH i deblakadi puta naše zemlje ka euroatlantskim integracijama. Lagumdžija je istakao da je na nivou BiH najpraktičnije i najlogičnije bilo da vladajuća koalicija u RS-u i stranke potpisnice platforme formiraju vlast. On je dodao da su potpisnici platforme spremni da uđu u formiranje vlasti i sa dva HDZ-a i SDS-om, samo ako bi to bila široka koalicija.